

tourmens que vous avez mérités par vostre impiété. Perseuere comme ont perseueré les Prophetes qui t'ont precedé, ne t'impatiente pas de voir la punition des infidelles, ils la verront lors qu'ils ressusciteront, & croiront n'auoir demeuré qu'vne heure dans leurs tombeaux. C'est ce que Dieu commande de prescher il n'exterminera que ceux qui desobeyront à ses commandemens.

*LE CHAPITRE DV COMBAT,
contenant quatre-vingts huit versets,
escrit à la Meque.*

AV nom de Dieu clement & misericordieux. Les bonnes œuures sont vaines & inutiles aux impies, & à ceux qui empeschent leur prochain de suiure la loy de Dieu, il pardonne les pechez à ceux qui croyent en ce que Mahomet a presché, c'est la verité mesme qui procede de sa diuine Majesté, mais les infidelles ont suiuy la vanité, & les fidelles ont embrassé la verité enuoyée de leur Seigneur, ainsi Dieu parle au peuple par parabole. Lors que vous récontrez les infidelles en temps de guerre, coupez-leur le col, tuez-les iusques à ce que vous les preniez prisonniers, alors, liez-les, apres ce où vous leur donnerez liberté, ou vous les mettrez à rançon, iusques à ce que leur party aye mis les armes bas. Si

Dieu vouloit il vous donneroit la victoire sans combattre, mais il vous veut esprouver, il conduit dans le Paradis ceux qui sont tuez pour la deffense de sa loy, & leur donne la grace. O vous qui croyez en Dieu, si vous protegez la loy de Dieu, Dieu vous protegera, il affermira vos pas, & exterminera les infidelles, parce qu'ils ont mesprisé ses commandemens & leurs bonnes ceures leur seront inutiles, ne considerent-ils pas quelle a esté la fin des impies qui les ont precedez & que Dieu les a exterminéz ? il les exterminera de mesme façon, parce qu'il protege les fideles, & que les infidelles sont priuez de la protection, il fait entrer les gens de bien dans le Paradis, dans des iardins où coulent plusieurs fleuves. La punition des impies est quelquefois differée dans le monde, ils vivent comme des bestes, mais le feu d'Enfer est preparé pour les punir ; combien auons nous ruiné de villes pl⁹ fortes & plus riches que celles d'où on t'a fait sortir ? elles n'ont point trouué de protection. Ceux qui embrassent la loy de Dieu, sont ils semblables à ceux qui suiuent leurs appetits ? Dieu a promis le Paradis à ceux qui ont sa crainte deuant les yeux, il y a dans le Paradis des fleuves d'eau qui ne reçoit point d'alteratiõ, il y a des fleuves de lait qui ne se corrompt iamais, il y a des fleuves de vin saoureux & delicieux au goust, il y a des fleuves de miel pur & net, il y a des fructs de toute sorte, & la grace de Dieu pour ceux qui obeyront à ses commandemens, les meschans demeureront eternellement dedans le

*C'est la
Meque.*

feu d'Enfer , où ils beuront vn breuage bouillant quileur bruslera les entrailles. Il y a des personnes entre les infidelles , qui escoutent ce que tu presche, lors qu'ils sont estoignez de toy, leurs Docteurs leur demandent ce que tu as dit du iour du Iugement ; Dieu a endurcy le cœur de telles gens, & ne suiuront iamais que leurs passions. Dieu augmente les graces de ceux qui obeïssent à ses commandemens, & les fortifie en leur perseuerance ; Les infidelles attendront-ils que le iour du Iugement les surprenne ? Les signes de ce iour ont desia paru , ce iour le repentir leur sera inutile, Il n'y a point de Dieu que Dieu, demande luy pardon de ton peché, & pour ceux & celles qui croyent en sa loy, il sçait ce qu'ils font de iour & de nuit ; Si le Chapitre du lieu où se rend la Iustice n'eust esté enuoyé, & qu'il n'eust fait mention des combats , tu aurois veu ceux qui doutoient de la loy te regarder avec des yeux troubles à cause de la peur qu'ils ont de mourir ; Enseigne-leur l'obeïssance, & leur parle avec ciuilité. Si'eussent crû & obey, lors qu'on leur a ordonné de combattre, ils auroient fait vne bonne œeure. Auez-vous desobey ? auez vous quitté la loy de Dieu pour salir la terre ? & pour vous priuer de sa misericorde ? Dieu rend sourds & auugles ceux qu'il maudit, & ne comprennent pas la verité del'Alcoran. Ont-ils le cœur fermé ? Ceux qui sont retournez dans leur impieté apres auoir cognu le droict chemin, ont esté tentez du Diable, & particulierement lors qu'ils ont

dit aux infidelles. qu'ils leur obeyroient en quelque chose, Dieu sçait tous leurs secrets, que deviendront-ils lors que les Anges les feront mourir: il les battront par deuant & par derriere, parce qu'ils ont encouru la colere de Dieu, & qu'ils ont mesprisés ses commandemens, leurs bonnes œuures leur seront inutiles, pensent-ils que Dieu ne mette jamais leur malice en évidence? Si tu veux ie te la feray voir, tu les cognoistras à leur fizionomie, tu les cognoistras à leur voix & à leur parole; Dis leur, Dieu sçait tout ce que vous faites, il vous esprouera pour faire cognoistre les fidelles & les infidelles. Les impies qui empeschent le peuple de suivre le chemin de salut, qui contredisent au Prophete apres auoir eu la cognoissance de la loy de Dieu, ne font pas de mal à sa diuine Majesté, leurs actions sont vaines & inutiles. O vous qui croyez obeissez à Dieu & à son Prophete, & ne rendez pas vos bonnes œuures inutiles par la desobeissance, il ne pardonne pas aux impies qui deuoyent le peuple du chemin de salut, & qui meurent dans leur impieté; Ne foyez ny laches ny paresseux, vous serez victorieux, Dieu est avec vous. Il ne vous priuera pas de recompense, la vie de ce monde est vn iouët & vn abus, si vous croyez en Dieu, & si vous auez sa crainte deuant les yeux, il vous recompensera de vos bonnes œuures, il ne vous demandera pas compte de vos richesses, s'il vous en demande, c'est pour vous empeschier d'estre auaricieux, & pour bannir l'vsure d'entre ceux qui croient en sa loy; O peuple, il vous est

ordonné de faire quelque despense pour l'amour de Dieu ; Celuy qui sera auaricieux & chiche en cette occurrence sera auaricieux & chiche enuers soy-mesme. Dieu est riche & vous estes pauvres, si vous mesprisez sa loy, il créera d'autres personnes en vostre place qui ne feront pas comme vous.

*LE CHAPITRE DE LA CONQVES-
te, contenant vingt-neuf versets,
escrit à la Medine.*

*C'est le Chapitre de la prise de la ville de la Me-
que.*

AV nom de Dieu clement & misericordieux. Nous t'auons donné vne victoire euidente, Dieu te pardonne le peché que tu as fait lors que tu as esté trop prompt, & lors que tu as esté trop tardif (à combattre pour sa loy,) il accomplira sa grace sur toy, il te conduira au droict chemin, & te protegera puissamment. Il a deliuré de peur le cœur des fidelles pour augmenter leur foy, il dispose des forces des Cieux & de la Terre, il sçait tout, & est tres-prudent. Il fera habiter eternellement ceux & celles qui obeiront à ses commandemens dans des jardins où coulent plusieurs fleuves, & leur pardonnera leurs pechez, c'est la suprême felicité ; Les in-